

Newspaper	UTUSAN MALAYSIA
Date	10 NOVEMBER 2016

Pemain industri perlu beralih kepada digital

UM - 10/11/2016

KUALA LUMPUR 9 Nov. - Sektor ekonomi negara ini tidak akan dapat bersaing jika pemain industri tempatan tidak melakukan perubahan paradigma dengan mengadaptasi sepenuhnya potensi ekonomi digital.

Perdana Menteri, Datuk Seri Najib Tun Razak berkata, adalah tidak mustahil pemain industri tempatan akan mengalami kepupusan seperti dinasour jika masih bergantung kepada konsep ekonomi konvensional.

“Saya lihat bahawa dalam bidang ekonomi digital ini ia satu perubahan paradigma dalam masyarakat kita, dalam erti kata ekonomi digital akan menggantikan ekonomi yang berkonsepkan konvensional.

“Kalau dulu kita buka kedai runcit tapi kedai runcit sekarang sudah diambil alih oleh pasar raya atau kompleks membeli-belah. Kalau dulu kita beli buku di kedai-kedai buku, sekarang kita beli melalui *Amazon.com*.

“Kalau kita tak ikut perubahan ini, kita akan tewas dan kita akan jadi pupus macam dinasour, kalau ikut dari segi sejarah kita akan menjadi dinasour,” katanya ketika menjawab soalan peserta sempena perasmian Persidangan Daya e-Usahawan 2016 di sini hari ini.

Yang turut hadir Menteri Komunikasi dan Multimedia, Datuk Seri Dr. Salleh Said Keruak, Menteri Pendidikan Tinggi, Datuk Seri Idris Jusoh dan Timbalan

Menteri Perdagangan Antarabangsa dan Industri, Datuk Ahmad Maslan.

Pada majlis tersebut, dua usahawan muda iaitu Umarul Arifin Jeffri, 23, yang juga pengasas Umashi Resources dan Anis Adilah Noor Azaman, 22, pemilik Anis Adilah Enterprise diberi peluang untuk berada sebentar dengan Perdana Menteri.

Mengulas lanjut, Najib yang juga Menteri Kewangan berkata, generasi milenium Malaysia hari ini, yang lahir dalam zaman teknologi tidak seharusnya melepaskan peluang untuk menceburi dalam bidang ekonomi digital.

“Saya hendak setiap rakyat Malaysia bukan hanya sekadar

menjadi peserta yang pasif tetapi harus menjadi pemain yang aktif dalam era yang dipanggil sebagai revolusi industri yang keempat ini,” katanya.

Sementara itu, menyentuh mengenai perancangan mewujudkan Zon Perdagangan Bebas Digital pertama dunia di negara ini yang diumumkan beliau semasa lawatan ke China baru-baru ini pula, Perdana Menteri berkata, beberapa perincian sedang dijalankan.

Jelasnya, dalam menjadikan zon perdagangan itu menarik beberapa aspek seperti ciri, insentif, dan perundangan tertentu sedang diperhalusi sebelum penubuhannya dimuktamadkan pada Mac tahun depan.